


OVULUXIWA WOOMALELA

 Miyo kaari ntoko nkaasuwela etthu y'ohimya voosiis'ula. Miyo kaakilaanthe ottuli iwe ni Munna Egan, nto kaahiiwa . . . Munna Neville aahimya etthu, ni akiwehaka miyo. Nto miyo khumwiirela Munna Egan, "Owo onookiihana?"

Nto owo khwira, "Ti siiso."

² Vano nto va miyo kiri vasulu va wira kihimye etthu voosiis'ula. Kaamuupuwela, okathi waaryaaka . . . Nivekhulelo vale, vaavo awo . . . ninookuxa nsu, enkhala ntoko ninoopurula, mwaalavulaka. Enkhala ntoko nivekhulelo ninookuxa nsu naanaanoru.

Miyo kaamwiiwa siiso . . . onamoona okathi waary'aka mpaani mme wira kinvekelele muthiyana mutelefoonini. Nto ole aakhenle muhupi, orooliyala ohela epooma ya nipuro no wiihana, ya mwaara a Dr. Morrison. Nto miyo kinimooleelani paahi etthu kiiraly'aka, wa mavekelo anyu nyuwo othene, ni awaka. Miyo kiixaathenrye matata vatelefoonini, khuthoonya nummaru, khula nipuro naaryaaya, ni khuvekela Erooho Yoowaarya orowa wa muthiyana. Tivo kinoona wira Eyo yaamwiiwa siiso ntoko Eyo yaarowaaya hiyo naari . . . Munnona? Nto miyo khimuttipiha paahi. Ni siiso ekhanle-ene wira eyo ti yaari enamuna Apwiya yaatthunaaya. Munnona? Pooti wira yaamukhala yooreera siiso.

³ Vano nto kaahiiwa onamoona kiryeene memme, wa mutthu mmosa aahimya wira Munna Rook muthiyana aarina . . . Kookupali wira Munna Neville ohimye wira owo aahikhalana o—otepanyeya muupuwelo, siiso. Nrowe nilipane Muluku wa yeeyo, nuupuwelaka etthu emosa ela paahi: Muluku onnaasuwela ale Awawe. Owo onnisuwela sothene sa yaawo.

⁴ Munniwerya wiiwa saana ottuli? Mwaahiweryeke, sookhala ikhatera soohikhaliwa nno. Pooti opatili mwatthuna vale. Nto, nrowe noone, ti *yoola* miikoro muulupale? [Munna mmosa oniira, "Nnari, mulopwana."—Mol.] Ola *va* t'ori miikoro muulupale? Vaareera. Nnimoona sinto ninoowerya waattamelaxa vakhani. Ankhi va, Gene? Siiso onookhala saana. Nto imaara sikina kinnilala vammilo vakhani; kinnikhala kilaleyaka vanci-ene. So ori saana? Munniwerya wiiwa saana?

⁵ Ni hiyo vekeekhai ninnuupuwela iya mmavekeloni. Ni nintthuna nihimye muthukumano woovuwa wa o . . .

Kininweha Munna Rook muthiyana? Koono wira kaanweha muhano mmosa ottuli nno aalattana ni yoowo. Kaahuupuwela, "Vekeekhai nkinlavula ni anenli va." Kaanweha mutthu

oolattana ni yoowo, epantte y'ottuli. Owo ori oxipiritaali Saint Edward.

⁶ Nto siiso, oCleveland, Tennessee, ni tho oCalifornia, naahikhalana mithukumano soovuwa. Apwiya yaahireerihha vanci-ene, n'itthu sinci-ene Awo yiiraly'aya. Ni hiyo nootteeliwa murima mwaha wa yeeyo. Otteeliwa murima oweriya waahokolowela ale awihu, nihimyaka oreera murima ni omoriwa ikharari wa Muluku. Ti siiso awo yiirakaaya mBibiliani.

⁷ Miyo kaaxukhurela mavekelo a Munna Neville, ahiiso a Munna Beeler, moota owo aavekelenlyaawe atthu, ni—ni avekelaka mukhaliheryo ni omoreliwa ikharari. Nto hiyo naweharu paahi, nyuwo kweekwe, itthu sothene siniiraneya, munoophwanya wira yookhala etthu yooloka saana ya yeeyo. Vano nto okathi Munna Neville oruuly'awe khwaaruha matiyaakono ala, ni sikina, vaplataforma va, wira—wira avekele iparakhha sa Muluku wa yo—yoovaha ya ekereja, kaahimwiiwa owo ahimyaka mmavekeloni mwawe wa Muluku, mwaha w'axilopwana ale, moota awo yaavekelelanne-aya mmosa ni mukhw'awe. Nto eyo ennikikhaliha saana omwiiwa pastore onwerya waavekelela matiyaakono awe, ni matiyaakono onvekelela pastore. Moonaka ekereja ekhaliheryanaka siiso, ahe, yookhala etthu enihalela weetteetta. Ti siiso ekereja erinaaya okhala oratta-ene. Ni eyo yaahikivaha muupuwelo wa mwaha mmosa. Kaarowa olavula mwaha wa eparakhha oKadexi, ni okhoottiwa wiiwiwa wa yoohimya y'alipa-oohottela, masi kirukunxela moonelo aka, etthu ekina nto.

⁸ Nto vano, naahimyaka ovonihwiwa, kookhalana onamoona mwaamukhaani paahi kaatthun'aka ohimya. Kaaniroromela omoona mwan'aka, Billy, ottuli iwe, masi owo ookhalana mpoolosani mwawe.

Nto Billy onnikhalaka saana mmithukumanoni, ovikana saakhalak'awe. Aari oonanariwa, oonyoonyiwa, ni ntoko wira aanaaleela atthu, "Oh, murowe mwakilaathi. Murowe mwakilaathi." Airaka, "Miyo ki—kinimoovahani ettikitti ya mavekelo." Masi kirooweha, naanaano, anookhala atthu vamuthukumanoni owo oniwoonel'awe othunku saana. Owo aahikhalane ittikitti sa mavekelo sihanle, nto onimwaaroiha musaala wira kiwerye orowa waavekelela.

⁹ Nto etthu siiso yiiraneiyee oChicago, emaara yookiserya. Ni kaatthuna kisome epaphelo yeeyo owo avolowa vale. Nkinaphiyerye omoona. Owo khaasuwela wira kaamoorwa voosiis'ula, va, ni—ni kaanitthuna—kaanitthuna epaphelo eyo. Masi kinoomalaru wuupuwela yeeyo okathi wuupuwenlyaaka waattaxa iretta. Nto ti siiso eryaaya. Eyo epaphelo yoolipiheriwa wira. . .

Miyo kaamusoma mpapheloni mwa ihapari, (nkaasomme; kirooleeliwa) wira anahapari yaamuulumela Oral Roberts,

mwaha wo onvekelela muthiyana mmosa aarina tiyapeeti nto khukhwa. Nto miyo, vano, ntoko mutthu a wAmerika, miyo—miyo okisivela wiiwelela malamulo ni—ni mutthu orina okhulupale. Masi kinoona wira kahi ya xariya. Kaatthuna kisuwele sinto yaamutthuna waahela, mpapheloni mwa ihapari, othene ale Oral Roberts aavekelenlyaawe khuvona, matothoro yaahiyaly'aya. Kinniikoha, sinto awo yaamwiira voovirikana emara emosa mano, moone. Awo khiyaarowa wira. Vano nto kinoona wira khino xetwani ohaavirikanya vanci-ene, wira, ni Muluku atthuniheryaka, wira Nihiku na Olamuliwa awo ahaana waakhula mwaha wa yeeyo. Masi miyo kinnaasuwela atthu ikonto sene Oral Roberts aavekelenlyaawe, yaakhwa, vano awo akumi.

¹⁰ Tivo, moone, awo, kha-naxariya wa yeeyo. Awo anoohimya epante aya, epante yo wuulumela, masi khanrowa ohimya epante ekina. Vano, epaphelo ya ihapari ehaana waakhaliha atthu otthariha sookhumelela sa naanaano. Nto kinuupuwela wira, atthu yakhalaru oocaliwa mmosa ni mukwaawe, mutthu avonihwa vale, ovonihwa vekeekhai, khula epaphelo ya ihapari oEstadu Unidu yaahaana ohela ehapari ya yeeyo. Masi khamunwerya waaliva wira yiire. Nnari. Nyuwo mwaroiharu etthu siiso weiwo, awo anootheya nikwara ni otheya, ni anootikiha. Masi vano yaakhanle-ene etthu wira yuulumele. . . Eyo enooniherya paahi wira elapo ela ti yoolikana wira elamuliwe. Khweeli. Ni ohaana okhala olamuliwa, ni khiivo enamuna yo otthyawa. Ni awo anthukumanya mooro paahi vamuru vaya, ni siiso. Ni yinci-ene e—e. . . oohiiwanana, wa malamulo! Epaphelo ya ihapari, malamulo aya, ti wa—waahimeerya atthu etthu p'itthu yooreera wala yoonanara, enkumelela. Masi awo aahiya malamulo aya. Nto awo yaahiyaka malamulo aya, nto awo—awo khandtharihela etthunelo aya oratta-ene.

¹¹ Nto t'enamuna emosaru ery'aya ni ekereja. Ekereja yaahiyaka malamulo aya, eyo khenkhalakhala yaarumeelaka masantu oratta-ene. Nihaana okhala vamosa, nihaana okhala oowiiraana. Nihaana okhala murima mmosa ni mwiiwanano mmosa. Ahiiso, khandinrowa omurumeela Muluku wala atthu, vooikhala wira niri ni murima mmosa ni mwiiwanano mmosa, wira neemererye malamulo a Bibilia ni itthu Muluku ohimyaawe wira ti sikhale sooreera. Hiyo nihaana kweekwe weemererya seiyo.

¹² Billy aahikhala musaala, oChicago, owo. . . Mutthu mmosa aarimoorwa wa yoowo, muthiyana mmosa n'ay'awe, ni kankuru mmasasuni, akhwaaka. Nto amwaar'awe yaaroosupiwa vakhaterani va iroota, nto awo ephavelaka omukhapelela mulopwana waari woomurikela ovenya, ni kankuru vansasuni. Nto Billy khumwiirela, owo khwira, "Ki—kinnoona othunku, mulopwana." Khwira, "Miyo kaamutthapela woovahani ettikitti

ya mavekelo.” Nto owo khwira, “Masi miyo—miyo nkirina ekina ehanle.”

¹³ Nto owo khwira, “Ahe, vaareera, mwan’aka.” Owo khwira, “Eri saana.” Khwira, “Hiyo naahiilipiha wira niphiye va, masi ti yoonirikela vanci-ene.”

¹⁴ Billy khwira, “Kinimooleelani etthu yo wira.” Khwira, “Miyo kinrowa waaruuha atithi aka. Ni kinrowa waakeliha, ni kinimwaakumiha.” Ni khwira, “Miyo kaira vale, vammalaanyu wiiwa Mutthaka aya,” khwira, “vano mwaakuxe awinyu... ahiiso amwaar’inyu ni nyuwo, ni nvolowe esaala yaamukhaani iwe onviraaka-mo, nto kinoowiiriha awo woovekeleleni.”

¹⁵ “Oh,” owo khwira, “eyo ti yoottotlopeleya, mwan’aka. Eyo ti yooreera saana.” Munnona? Wookhala o—wookhala mweettelo. Munnona? “Yooreera saana. Ti yooreera.” Munnona?

¹⁶ Nto ohiyu yoole, Billy, varonwaawe ottuli iwe, nlelo evirikanaka n’ile owo aahimyaawe, wira owo aahikhalana mulamu awe weiwo aavuuva ephome mmasasuni. Ni mwaatani awe weiwo, aavuuva ephome munapwiiipwini, ni makhwatta, yaawo-tho yaavolowanse ni yaawo, yaavanhe mukhaliheryo wira evolowe. Muhaana oweha, enookhala esaala yothene yoosarya, moone. Masi naahivira vale khwaavekelela, naahaakhela ewarakha, okureyu, wira mulopwan’owo aahivonihiwa voolikana kankuru ule mmasasuni mwawe. Muthiyana, amwaar’awe vakhaterani va iroota, aavenya, aneetta voolikana ntoko saatonko aya okhala. Mulopwana aavuuva ephome ya—ya mmasasuni, mwaha wa elapaha, oovona voomalela. Ni amwaar’awe aavona makhwatta a murupela. Axexe aya oovonihiwa, voottharana! Kaatthuna kisuwele sinto ipaphelo sa ihapari saamutthuna otthitta yeeyo. Munnona? Munnona? Munnona? Oh! Masi Muluku nlelo Mulukuu. Owo oniira itthu mwa enamuna Awe Yoowo paahi, nyuwo moosuwela, ni Owo t’oreera murima saana. Hiyo ninnitteeliwa murima osuwela wira Owo ti Muluku.

¹⁷ Hiyo naamulavula voosiisu umosa mwaha wa mulaleyi mmosa mwaamukhaani nimmusuwelaahu, aarowaka, waavekelela aretta n’itthu sothene. Vano owo aahirowa khunvekelela mutthu oxipiritaali oLouisville, ni mwaha wa elapaha, muhan’owo khukhwa. Mwammiravo owo khwira, “Ahe, khivanthuneya...Muluku kho...Khokhanle hata Muluku. Owo aammaliherya Masu Awe.” Khwira, “Miyo kiroomuttikitthela paahi ntoko—ntoko Bibilia sihimaly’awe. Owo aahimaliheryeke Masu Awe, Owo kahi Muluku.” Khwira, “Eyo eliivuru paahi.”

¹⁸ Vano, eyo yaarowa okhala ntoko siiso vahaakhanle wira mwaanimusuwela Muluku. Eyo epantte ya Soolempwa, masi kahiyu Soolempwa sothene. Eyo entthariha waamini wa mutthu. Munnona?

¹⁹ Nto miyo khwaaleela amwaar'aka, miyo khwira, "Sinnikhalaka itthu sinci-ene siniiraneya, miyo kinsuwel'aka paahi wira sookhala. Nkisuwenle etthu enrowa okikhumelela woomalelani. Siiso kirowaka omalela siiso. Muluku aphiyeryaru okumiha ntata Nawe na omoriwa ikharari mwa miyo, kinrowa omalela siiso. Masi vaakhalakaru wira Owo onookhaliha ntata Nawe na omoriwa ikharari ni weettiherya mwa miyo, kinookelela ohoolo." Masi kaahimukoha Meda, miyo khwira, "T'ani aari okatthi voosiis'ule nuumala okhalana yoowoona ya miyo omoona mwan'aka mwaamukhaani, Sharon?"

²⁰ P'uhimya wene, nihiku nlo, miyo kaahalela ohileya. Miyo kaakilanthe mphironi. Ni nyuwo munnimusuwela wahala aka a yoowoona ya yoowo, numala yeeyo. Vano miyo kaahiweha, oviraka mpararini mwaka, nto vale aarwa mwaaruusi mmosa muramphani nno oJeffersonville, yaari voolikana ntoko yoowoona yeeyo. Vekeekhai kaahaana ovaraaniha matat'aka. Khiyaareere olattana ni yoowoona ele ya Sharon aka mwaamukhaani! Owo aari mwamuthiyana nto.

²¹ Nto nuumala yoowoona eyo voosiis'ule, okathi Movuwani, miyo... Hope aakileel'awe, ni moonoo awe vanikhatani vaka, airaka, "Muhixanke mwaha wa hiyo, Bill. Hiyo nri vooreeraxa." Miyo kaaphavela wiisiiva. Nto owo khwira, "Muhixanke. Mukimanele natiri wira khamunrowa-tho oxanka."

²² Nto miyo khwira, "Nkinwerya woomanelani natiri, Hope, okhala wira miyo—miyo—miyo ki... Miyo kinnixanka. Nkinwerya okhottiherya."

²³ Nto miyo kikhuma mwa yoowoona, keemenle-ene okatthi wooriipela. Nto kahi yoowoona, kahi wuupuwelela, masi moonoo awe nlelo waarookipatikha. Nto owo aamukimana. Miyo kuupuwela, "Nwehererye minuutu mmosa. Ela kahi..." Nkaasuwela etthu yo wiihana mahiku ale, yoowoona. Miyo kiihanne okwanyuwa. Miyo khwira, "Ela e... Ntata naya nlelo niri vaavale." Miyo khwira, "Muri vaava, Hope?"

²⁴ Awo khwira, "Bill, mukimanele natiri wira khamunrowa-tho oxanka mwaha wa miyo ni Sharon." Okhala wira, kaari woomalelani w'ephiro. Miyo kaahilikana wira kiisiive.

Miyo khwira, "Kinnoomanelani." Nto awo khukipatikha, khukimana ni ntata naya.

Nto vo miyo—miyo khwira, "Hope, muri vayi?" Miyo khukuxa... khwaapapela, mpakha ovara ekwirinti yaamukhaani vamuthukoni khupurula. Miyo khurowa, kiphavelaka va khula ekhatera, wira koone sinto awo yaakilanthe vaavale.

Owo ti Muluku. Owo vekeekhai Muluku, olelo, ntoko Owo aaryaawe Vamwaako va Orukunuwa okathi Moise ni Eliya yaakhumelelanse-aya. Owo nlelo Mulukuu.

²⁵ Hiyo pooti ovira mmikattiyamihoni sinci-ene ni mowehereriwani. Muupuwele paahi, ookhala Mutthu onsuwela, ommwaleela ephiro, onikhaliha y'ekeekhai. Miyo nkisuwenle ele eri ottuli w'ekuwo. Masi kinnisuwela etthu emosa, miyo kinniilipiha kitthimakelaka omukaanoni wo wiihaniwa wuulupale, khula nihiku, kiilipihaka wira kikhale mwaha wa yookhumelela ele yuulupale enrowa wiiraneya nihiku nlo; okathi onrowaaka omoona Yoowo, ethoni ni ethoni, ni omuthariha wahala, "Owoopoliwa ni mahala." Kinkhala mwaha wa nihiku nenlo. Kihiyaka itthu iyo ottuli, seiyo sikhanelle, kintthuna kiilipihe, kikhale kirowaka paahi.

²⁶ Kintthuna etapernakulu ila, vano mweemenlyaanyu saana, kintthuna wira mutthikele mwiilipihaka murowaka omukaanoni wo wiihaniwa wuulupale. Sothene muniiraanyu, nvaraane vamosa, mukhale emusi ntoko sinweryaanyu okhala, masi okathi wothene ni moonoo wowookowa, wira mumphwanyane ni mmuruuhe mutthu mukina, wira mwaakelihe. Masi mo Waaminini mu hiyo ninlaleeryaahu vano ni yoowo ninwanel'ahu, muhisuse hata esentiimeturu emosa wa Yoowo. Maana, mwaaminiki vale wira ka murumeyi Awe, ela t'eri etthokiheryo ya Muluku. Khenkhalakhala ekhalaka mwa oowaatta. Kweekwe enrowa okhala mwa ooyeva, kweekwe t'enkhalakaaya ni kweekwe enookhala. Masi, muupuwele, yoolempwa, "Muhoove, nikoto naamukhaani; Atithi anyu ohaasivela woovahani Omwene."

²⁷ Vano, nookhala nikhuru na miteko sa ekereja ahu, matiyaakono, maatiministratore, mahoolela a exikola ya Ttiminku, mapastore, ntoko etthokihwiwaaya ekereja ahu. Nto nyuwo, atthu, ti mwaathanlale alipa oovara miteko ala ni pastore ola. Miyo ka mulipa-oowehaxaxa a atthu othene paahi, wira kooneke seettaka saana, ni ovaha miruku ni siiso. Nyuwo ti munimuthanla pastore anyu, munaathanla maatiministratoore anyu, nyuwo munaathanla matiyaakono anyu, nyuwo munthanla khula muteko ori mukereja mu; nyuwo, atthu. Ni ti muteko anyu waakhaliherya atthu awo, moone, maana awo anoovonya. Awo annikhwa. Awo atthu paahi, ni awo anoovonya. Masi Mukhulupale a Estadu Unidu avonya vale, hiyo nnoomukumihya, okhala Mukhulupale? Hiyo ninooliyala eyo khunakelela ohoolo. Ti siiso hiyo ninthunaahu wira mukereja mwaha vano. Miyo kaanwiriyaana owo aavekelelaka, minuutu vakhani sivinre, matiyaakono ale. Ni wiiwa ottuli iwe, onamoona, vamukhora, okhuma wa maatiministratoore, moota othene mukhanlyaanyu ni mwiiwanano mmosa. Vano mukhale siiso. Vano, nyuwo mamempuru mwaakhaliherye maatiministratoore ala, matiyaakono, ni pastore. Ni muupuwele, nyuwo mwakhalanaru mwiiwanano ola, muupuwele wira muteko wa xetwani okupali wira yoononeya. Vano kweekwe t'enkhalakaaya ni okathi wothene enookhala. Masi nyuwo

mukhale n'akhulupale anyu, nto owo ti nvaanelo kaarowaaka okhalana.

²⁸ Nto vano kookhalana nave-tho va etthu. . . etthu emosa ya vakwaaturu ya ihapari voosiis'ula, mwaha wa muthukumano wa makhuru aatthu ooweetiherya n'akhulupale aya. Nto onookhala vakwaaturu ya ihapari. Ni kookhalana yootakiherya ya Munna Roberson, yoowo okhanle mukhulupale a ma- . . . a maatiministratoore. Ni tho kookhalana yootakiherya ya Munna Collins, woona waka, yoowo onvara muteko ntoko mukhulupale a nikhuru na matiyaakono. Nto vano, miteko iya sothene sinikhalihwiwa sittharihiwaka Soolempwa, ni awo ahaana okhalana malamulo a Soolempwa sa etthu entthuneya awo wira. Tivo, maatiministratoore aakhalana muteko aya. Ni matiyaakono aakhalana muteko aya. Mulipa-ooweetiherya exikola ya Ttiminku ookhalana muteko awe. Ni pastore t'okhanle muru wa nikoto.

²⁹ Vano, khula mmosa a ala ookhalana itthu sowuulaana. Ni kinoona wira muthukumano anyu khiwaakhanle okhalaka vamosa, masi waahaana okhala ntoko khula muteko, okhala wira matiyaakono kharina etthu yo waahimeerya maatiministratoore voohikhala wira awo arina mwaha wira yaaroihele yaawo. Voohihiyana, maatiministaratore ankhapelela musurukhu n'itthu sa sooteka; awo kharina hat'etthu ni matiyaakono. Matiyaakono ti mapiliisa a ekereja, ni anamakhaliherya a pastore. Ni maatiministratoore t'aneetiherya muteko wa sookhalana sothene. Maatiministratoore kharina nnaata ni epantte ya sa muroohoni ya yeeyo, ni tiyaakono khorina nnaata ni epantte ya musurukhu ya yeeyo. Tivo, ehaana okhala siiso. Ni mulipa-ooweetiherya exikola ya Ttiminku onkhapelela exikol'awe ya Ttiminku. Vano kihaana sothene soolempwa, sootthittiwa ni kokhoothi, wira sikhale vakwaaturuni ya ihapari.

³⁰ Vano nto ninrowa-tho ohela, vakwaaturuni, Mwiixuttiho ekereja oneemereryaaya, ni nikhhalane Yoowo wooreheriwa-ene va, mukereja; ele eneemereryaahu, ma—makano, Mwiixuttiho wa ekereja. Vano, wira nikhale ekereja, nihaana okhalana mwiixuttiho.

³¹ Hiyo khaninhela hata ikhomo, ni wira, “Hiyo ninrowa paahi mpakha *va*.” Hiyo ninoorowa ottaiwene, ni opatthana n'atthu othene, Muluku onrowaawe onitthuniherya orowa, mwa Soolempwa Sawe, n'atthu. Ni vano mukhale oowiiiraana, mukhale a mwiiwanano mmosa, murima mmosa, ni mukeleleke ohoolo ni Muluku. Eyo t'inamuna Muluku ontthun'awe wira niireke.

Vano nrowe nivekele, nto nuumala nikhunle Masu.

³² O Pwiya ooreeraxa, hiyo nihanle waattamela Masu a eMuluku, ahiiso osommwa wa Masu ala. Erooho

Anyu Yoowaarya enitaphulele ele hiyo eniphavelaahu. Ni munitthuniherye olavula, Pwiya, ni wira ni okhala, nisuwelaka wira hiyo othene n'an'Inyu, mwaha wa mahala, okhala wira Nyuwo mooniihana. Okhale opatthana mukereja mu, woonaka wira nihanle okela mmweetteloni muulupale, hiyo ninnoona, waakhaliha arumeyi akina wira erowe mmapuwani memmo, Nyuwo mwakiruma-ru ipantte soohiyana-hiyana sa molumwenkuni, weiwo olipihereye Waamini, nikhhalane murumeyi oolikana ni onthuna, ni ooxuttihiwa okhala ookhapelela. Ni wira Waamini waatonko ovahiwa athu ooreera murima, yoowo hiyo oneemereryaahu vookhomaala, okhale nttheko molumwenkuni mothene. Munivahe, Pwiya. Wira nikuttha nla na malaxi, ntoko naaryaaya nihiku nimosa okathi naavaherenryaahu wa Nyuwo, ekhale ekereja enivenya va, Pwiya, wira vaava akhume arumeyi ni anamalaleya ehapari ni awiixuttihi ni arummwa, erowe mapuro othene a mulaponi.

³³ Naatthuna nivekele, voosiis'ula, eparakha y'omeekha wa Munn'ihu mulopwana ni Munna muthiyana Stricker anihaawasa vano. Masi hiyo noosuwela wira hiyo othene ninniheliwa mowehereriwani mu. Khula mwaana onrwa wa Muluku ohaana ottharuxiwa, wehereriwa. Nto hiyo naxinttiwa vookhweya-vo, khuhokolowa, weeso n'ana oophwanyiwa, ni khanihiyo aana a Muluku. Munvahe Munna mulopwana ni muthiyana Stricker ikuru ni owerya, wira ekhale voopuroni vaya va muteko. Vakhala wira ahaana oveka yoolya anlyaaya, ntata Nanyu na eparakha nikhale mwa yaawo. Maana hiyo khanisuwene pooti okhala mwaha wo wiilipiha weiwo Nyuwo mwaarowaanyu owooniherya athu a wAfrika ele ekhanle okhala muKristu eekeekhai. Munivahe, Pwiya. Vano muhiye sothene siiriwe ntoko otthuna Wanyu.

³⁴ Mmureerihe pastore ola, Munna Neville. Hiyo ninnivekela, Pwiya, wira Nyuwo mmukhalihe makhampusi a nikoto, ntoko Nyuwo siiralyaanyu khalayi. Ni hiyo khanaarowa waaliyala amwaar'awe oophenteya, mwaara mwaamukhaani ohireere owereiwa. Nwanani waammusivela omuhiya Munna Neville nnikhuru nle n'anamwane, ehirina maama, masi hiyo ninnivenya ni ohela, mwaha wo waamini, Ephome ya Yesu Kristu eriyari ya nwanani ule ni murokor'ihu. Erooho Anyu, Pwiya, ekhale yuulupale mwa yoowo, nisuwelaka wira athiyana othene yoohimmwa wira ekhuruwe ni evire ekhato ela, y'epiphi ya okathi ula, masi hiyo ninvekela wira Nyuwo mukhale ni yoowo. Mwaareerihe anamwane ale axikhaani. Owo onrowa okhala oowuukhuwa vano, ni ooximwa, masi Erooho Yoowaarya ekhale mukhoro wa omoriwa ikharari, okathi wothene, wa ethhoko yeeyo.

³⁵ Mureerihe nikhuru nahu na maatiministratoore, Munn'ihu Wood, ni Munna Egan, Munna Roberson, ni othene akina, Pwiya. Matiyaakono, maatiministratoore, ni othene ale akhanle

oosonkhana mukereja, hiyo ninvekela, Pwiya, wira Nyuwo mwaatthuniherye orumeela okathi aya ni owaarya ni—ni exariya. Mwaareerihe, Pwiya, ale arumeenle okathi ovinre. Ni ninvekela wira Nyuwo mutthikele mukhalaka ni hiyo othene, wira nikhale oosuweliwa ntoko ekereja yowiiraana, ni Erooho ni ophentana w'Apwiya. Hiyo ninnivekela vano wira Nyuwo munikawele Masu, ntoko simphavel'ahu, okathi onsom'ahu mwa Masu Anyu oolempwa. Maana hiyo ninvekela mwa Nsina na Yesu. Amen.

³⁶ Nto kivekelaka, kaamuupuwela wira naareeriha ahiiso naavekela iparakha wa ya naanaano ahu...nikhuru n'ahu na maatiministratoore na naanaano ni siiso, kaamuupuwela Munn'ihu Fleeman ni Munna Deitzman n'akina akilaanthe va, yaawo arumeenle saana, khalayi. Ni ninthuna nimuxukhuru Muluku mwaha wa muteko aya woororomeleya. Apwiya ekhale ni yaawo okathi wothene, yaareerihe ni yaakhaliherye. Kintthuna kisome ehinatthi...Muupuwele paahi vano, ekwaaturu ya ihapari ni sikina, ni mithukumano sinoorwa.

³⁷ Ni nootteeleliwa murima okhalana ni hiyo, voosiis'ula... Ahe, khino kinoohimya sa, mulopwana mmosa onkhalaka oophwanelaxa wa miyo, okathi ovinre, ni oophwanelaxa vano, munna mmosa ooreera murima, Fred Sothmann, a... n'amwaar'awe, a oSaskatchewan, Canada, yoowo ori vaava wira eette ni hiyo, mulaponi mwahu, nawetta mmosa; masi moopatthanani mwahu, munna mmosa oophenteya, Munna Fred Sothmann okilaanthe vale. Owo t'akihoolelela ikampaanya okathi waary'aka oCanada.

³⁸ Ni munna mukina oophwanelaxa yoowo aari muCanada khalayi, yoowo aari mulipa a nakoso, ni onwerya wooniherya olumwenku wira nyuwo khamunwerya ovahaxa onvikana Muluku. Owo ni mpatthani awe aampakasa xahukhu a musurukhu wira etekase empa, ahiiso wa misawu sa ilapo s'okhopela, musurukhu. Ni yaahikiihana Oakland, mwaha wa muthukumano, ni khwiira wira yaahikhalana musurukhu. Awo yaamukhapelela yothene eyo, ni musurukhu aya.

³⁹ Munna Fred ni miyo naahehererya yeeyo ni musurukhu Munna Fred aarin'awe, yoowo miyo kahaakhenlyaaaka mmansaka. Vano nto khulakela waavaha athhu a oCanada ni khuhikuxa hata yoovaha, masi khiyaavanr'ethu saana. Mithukumano saari sooreera. Masi okhala wira khinaakuxale yoovaha...Miyo khenikicala ekereja yaakhalanne-ene itoolare ipilyawu emiya, nyuwo nlelo muhaana, wa Muluku, okuxa yoovaha. Eyo epantte yo okokhorela. Nto nyuwo munimwiiya eyo...Kinaamwi kikhalaka oovirikanya musurukhu ni ithu siiso, kinnisuwela wira, mutthu avonya vale, vanreerela mukupali wira moovonya, okhala wira Munna Fred ni miyo naahoona wira eyo khiyaakhumenle oratta-ene.

40 Ni, Munna Borders, okathi omuhin'ye-aka Munna Fred khurowa wa nyuwo Oakland, miyo kiirale, "Muhiire siiso. Nvirihe muhasa wa soovaha paahi, mukuxe yoovaha, nto, etthu p'itthu, muttikiherye mmusurukhuni mwanyu okhale wa muthukumano mukina nipuro nlo."

41 Nto muteko ohinatthi omala, Munna Border ni axipatthani awe khukirweela, khwira, "Wothene nihelenlyaahu mu-muthukumano, woothukumanyiwa."

42 Vano nto, mahiku vakhani avinre, owo aahitthokiherya muthukumano oSan Jose, California, weiwo owo aarin'awe ntoko, kinoona wira ikereja miloko mithanu na mosa wala miloko mithanu na miili veekhatoni, sothene sa waamini woohiyana-hiyana sikhaliheriyaka. Naahikhalana muthukumano wooreeraxa, ni ninoohokolowa, Novempuru. Nootteeliwa murima okhala ni hiyo, Munna Borders ni Munna Fred mukilaanthe ottuli iwo. Nto axilopwana ala khino aletto wa nyuwo othene, masi awo annikhalaka axinna oophwanelaxa wa miyo mmapuwani, niwanelaka saana Waamini hiyo oneemereryaahu. Muluku ooreeriheni, munna. Ninnitthapa okhala ni nyuwo voosi'sula, mutapernakulu, yaamukhaani ya khalayi va. Khiivo yoothamalaxa. Masi yookhala etthu emosa va, wira, hiyo noosuwela wira Muluku onkhala vaava, moone, tivo hiyo ninnitthapa mwaha wa yeeyo. Ni aakhala axinna akina oophwanelaxa, kaakhalanne-ru okathi wo waaromola, ari ni hiyo.

43 Vano kinnihoolela ni ovekela wira mahiku vakhani anrwa, Apwiya yatthuna vale, kintthuna kirowe, koonaru weettiheriwa . . . nkinatthi ohimya. Muthumano onttarelana, Ohio, kakhale ni Munna Sullivan, mmapantani, muhina mwa okathi vakhani. Eri paahi ntoko imiilya emiya iwe, kookupali, Gene, etthu ntoko yeeyo. Waamukhala mukwaha wooreera, vakhala wira khamutthokihale wiitthyuwa wanyu, Apwiya yatthikela-ru oneettiherya. Mulopwana mmosa ooreera murima saana, ni ninnimuxukhuru Munna Sullivan, muteko wooreera. Paahi e . . . Owo ti mukhulupale a munisiipiyu a epooma. Owo aari mukhulupale a khalayi, ni muKentucky mmosa a enamuna ya khalayi. Eyo ti yothene kikhanyaaka ohimiyaka ya yoowo. Okathi waakumanne-aka ni yoowo nihiku nlo o . . . Hiyo oowanli nileliwe iwe mmiyaakoni sa oKentucky. Owo aahikiirela, "Nlelo mookhalana asafetida anyu muxikoni mwanyu, Billy?" Vano nyuwo moosuwela moota—moota Kentucky owo okhanlyaawe. Vano nrowe nikhunle mu . . .

Kahi ohaattittimiha axinn'aka a oKentucky va, Munna Jefferies, n'akina. Miyo ka muKentucky, nave, nyuwo moosuwela. Kinimooleelani etthu emosa hiyo nikhanlyaahu. Hiyo khanihiyo aKentucky, nnakhala khanihiyo a wAmerika. Hiyo n'anawetta ni amalapo. Hiyo nimphavela Muttetthe onoorwa.

44 Vano wa osoma, nrowe nisome Multiivuruni mwa Okhuma, minuutu vakhani. Kintthuna kisome opacerya kapiitulu 23, ni versiikulu 20 mpakha 23, nave. Ni kintthuna kikuxe nisomi nimosa voosis'ula, na ntoko nla, na nla, kiireke: *Ovuluxiwa Woomalela*. Ni nkinrowa opisa, kilavulaka, vano koolipelelakani okhunla Eliivuru anyu ni ekapiitulu.

Moone, Miyo kinooruma Nlaikha ohoolo wanyu, wira noosukekeni mphironi, ni noorowanekeni nipuro kilokinhaaka.

Mwiikasoopeke nenlo, . . . mwiiweleleke nsu naya, muhitannye esara; okhala wira khinnoolevelalani sootheka sanyu: maana nsina naka niri mwa yoowo.

Kookupali wira muthukumano onnisuwela t'ani aari Nlaikha nla. "Nsina Naka niri mwa Yoowo."

Nto nyuwo mwaiwelelaru nsu nawe, ni wira sothene seiyo miyo sinihimyaaka; nto miyo kinookhala nwanani a awanan'inyu, ni kinimwaalupattha anoolupatthani.

Maana Nlaikha naka ninrowa wooholelani, ni wookelihani . . . wa Amori, . . . aHiti, . . . aPeresi, . . . aKanani, . . . aHivi, ni . . . aXepusi: vano miyo kinimwaapwetexa awo.

45 Apwiya ereerihe Masu Aya okathi onlavul'ahu vano minuutu vakhani, nyuwo mwavekela vale. Miyo kuupuwelela mwah'ola, wa: *Ovuluxiwa Woomalela*.

Ekereja enkhalaka mwa o—oyeva. Eyo kweekwe enookhala, mwa mapempuru, mpakha Yesu orwa. Masi Eyo enkhalala vathi va mireerelo soovahiwa ni Muluku. Vaakhanle wira naanisuwela paahi, ela ti Ekereja ya Muluku mukumi; kahi Branham Tabernacle, masi Branham Tabernacle epantte paahi ya Yeeyo. Sookhala itapernakulu sikina mulaponi.

46 Munna Snelling, ohiy'ula, onkhalana muteko w'opatiiso. Kaahiliyala wira Munna Curtis ookileela wira kihimye yeeyo, ahiiso okileenle wira nsana, aamukhalana. Owo ookhalana muteko w'opatiiso. Nto akhala mutthu va ohinatoko opatisiwa, nlelo, vano, Munna Snelling aamutthapela wira yeeyo, ohiy'ula. Eyo Etapernakulu ya Osantu oUtica. Ni Munna Junior Jackson, oNew Albany. Ni sookhala ikereja sinci-ene siiso mulaponi mothene. Masi hiyo othene ninkhala, okhala ntoko, epantte y'oxinttiwa, vowaatta, wala vakhani.

47 Koomwiiwa Munna Neville ohimya yeela voosis'ula, ottuli iwe, eyo yookuupuweleliha, wira atthu ankhala ntoko animwiikumihha moovuluxiwani. Enkhala ntoko wira etthu, eyo, atthu atonko aya woona, tivo awo anoosukhumela epantte emosa, "Oh, ahe, Muluku onniwerya wira." Masi owo kuhiyo ti mweettelo.

48 Vano, Moise, okathi owo aahaniwe-awe ni Muluku, owo aari profeta oomalela, vekeekhai.

Muluku anveleeliharu mutthu wira aire etthu, Owo onninvaha voomalela sothene owo omphavelaawe. Muluku amwiihanaru mutthu wira akhale mulaleyi, Owo onihela etthu mwa yoowo wira alaleerye-no. Owo amwiihanaru wira akhale mwiiuttithi, Owo onihela etthu mwa yoowo wira aixuttihe-no. Owo amwiihanaru wira akhale profeta, Owo onihela etthu mwa yoowo, wira ooneke sowoona ni okhala profeta. Muluku kweekwe onnimuhela ikaruma voomalela mutthu Awe.

Nto ti yeeyo Owo iiraly'awe okathi aamurumm'awe Moise wEjitu. Owo aamulenle mwa enamuna emosa. Ni Owo aamusominhe mwa enamuna emosa, ni Owo aahimuupa, khumpaka, ni khumpaka. Vaamanly'awe Owo omulaiherya Abrahamu, miyaakha imiya sene khalayi, wira Owo aanwoopola atthu, vano Owo—Owo aahikhalana mmuupuweloni wira aamumpaka Moise siiso Moise saapakiw'awe. Moise aari profeta oomalela. Vano nto, ory'ene profeta oomalela, nto . . .

49 Siiso ntoko nyuwo, mwaari muKristu, Muluku khonaapaka aKristu nuusu. Muluku onaapaka aKristu oomalela. Muluku khonaapaka alaleyi nuusu, masi mulaleyi onoowerya okhala nuusu. Ni Muluku onaapaka an'Awe aKristu, masi imaara sikina awo t'aKristu nuusu. Masi khuhiyo otthuna wa Muluku wira awo ekhale siiso. Iyo inamuna saya sintakanxeya ni etthokiheryo ya Muluku wa makhalelo aya, nto ti yeeyo enaakhaliha ntoko sinkhalaaya. Muluku khontthuna wira awo ekhaleke aKristu nuusu, wala alaleyi nuusu, wiisakaleliha khula epantte, wala . . . Owo onthuna wira awo yeemeleke voomalela v'ephakani.

50 Vano, Moise, Muluku aamukhalinhe profeta oomalela, wa ovuluxiwa voomalela. Ni Moise aahiivahererya voomalela mmatatani mwa Muluku. Mwaha wa yeeyo yaamukhalinhe-aya ele aaryaawe. Owo aari voomalela mwa Muluku mpakha Muluku vaaweryaawe omuroromela owo.

51 Miyo kinniikoha, voosiis'ula, ntoko aKristu, vakhala wira ninnivahererya otthuna wahu, ni wiivahererya voomalela wa Muluku, mpakha Muluku okhanlyaaawe oniroromelaka nipuro Owo onihenlyaaawe-vo. Kinniikoha, voosiis'ula, yoomi, vakhala wira kaamuwerya okhala oowiiivahereryaxa wa Muluku mpakha Muluku vaakhanlyaaawe okiroromelaka, vaakhanlyaaawe omuroromelaka Munna Neville, vaakhanlyaaawe ororomelaka nikhuru na maatiministratoore ahu, nikhuru na matiyaakono ahu, wala mamempuru a ekereja ahu. Hiyo othene nihaana nipuro, ni nihaana muteko.

52 Murumeyi ookhalana nipuro na muteko, wira eemele ni alaleerye mihakhu soohitokoseya sa Kristu, ohiisakalelinhe, aithhaniwaru wira akhale mulaleyi. Owo khaarowa wiinanela

etthu mwaha wa mutthu, owo aitthaniwaru wira akhale mulaleyi.

⁵³ Ni mempuru a ekereja, owo oitthaniwe wira okhale mempuru a nikhuru nla khata, vano owo khaarowa wiisakaleliha. Vakhala wira ekereja enaamini wira khinaakhanle omweettaka cuuku, vano mempuru uwo khaakhanle nnakhala okwanyaka iturufu. Hiyo khinnaamini owurya, owo aahaana orukunxa muru awe voomalela akhoottaka owurya. Vakhala wira hiyo khinnaamini omweetta cuuku, wala onvura sikaro, mempuru a ekereja ela khaarowa okhalakhala okwanyaka etthu ene eyo. Muluku onvaha ovuluxa voomalela. Okathi hiyo . . .

Owo onimwiira hiyo naivahererya-ru voomalela wa Yoowo. Hiyo naivahererya-ru voomalela mmatatani mw'Awe, nto Muluku onoowerya okhala mwa hiyo. Kristu, Nroromelo na Nttittimiho, Owo onoowerya wiisooniherya Mmansawe okhuma mwa hiyo okathi hiyo nniikumihahu mphironi. Vano miyuupuwelo sahu ti miyuupuwelo Sawe. Mwaamuwerya omutthokelela Kristu onvuraka sikaro? Mwaamuwerya omutthokelela Kristu awuryaka, wala attikhaka iturufu? Vano erooho anyu yakhala epante ya Erooho Awe, Owo ontthuna wira yiiwananeke ni olapa wanyu. Masi nyuwo munoomutthuniherya xetwani okela n'uxintta. Nto okathi wothene, mmurimani mwanyu, muhina saana, nyuwo moosuwela wira moovonya mwaairaka-ru itthu iyo.

Nto mempuru mmosa aamulavulaka voonanara mempuru mukina, nyuwo moosuwela wira ti yoonanara. Nyuwo munirummwa wira nvekelelaneke mmosa ni mukhw'awe, kahi olavulana voonanara mmosa ni mukhw'awe, masi wira mphentaneke mmosa ni mukhw'awe. Nto akhala mutthu omonre, nrowe ninvenxe, nimukhaliherye. Vano, eyo enninikhaliha ni—ni—nikhuru noowiiraana n'alipa-oowaamini. Vano, hiyo naahitthareke yeeyo, vano khanimmwiiwelela Muluku ni ninoomunanariha Muluku. Nto tivo, ekereja ahu, athu ahu ahinweryaaya wunnuwa, ekereja khenwerya okelela ohoolo, mwaha wo wira hiyo niri oohiiwanana, vamosa. Ntoko Yesu sihimmyaawe, "Miropo vakhani sinniipiha otthu wothene."

⁵⁴ Vano, vaakhanle wira nikhuru na ekereja, wala ntoko ma—matiyaakono, yaamoorwa ni wira naahaana o . . . nuupuwelaka wira nihaana oteka etapernakulu esya. Owo akhala ti mwaathanle a matiyaakono, ni wira maatiministratoore aakohiwa nto kharina musurukhu wo wira yeeyo, vano awo anookhalana eththokiheryo y'oteka ntoko hiyo sirinaahu eniiraneya vano. Vano nto enooruheliwa vamuthukumanoni wothene, ntoko saatthuneyaaya hiyo okhala, okhala wira ekereja yothene ti yootaphuwa. Vano ekereja yathanla yeemereryaka etapernakulu esya, vano hiyo othene naahaana wuukihana mwa oteka etapernakulu esya.

⁵⁵ Voohithepya, yoomi, okathi awo akihimenryaaya miyo, mwaha wa etapernakulu esya, miyo kaahivirikanya muupuwelo owo. Ti yeeyo. Miyo khwira, “Vekeekhai hiyo khanimphavela etapernakulu esya. Miyo alakela kinookhuma va voochilekela, ntoko Apwiya...vakhalaru wira ele Awo akoonihenryaaya enimwiiraneya. Exeeni hiyo emphavelaahu etapernakulu esya? Hiyo khanirina musurukhu.”

⁵⁶ Vano kaahirwa khukhalana moonelo wa ekereja, wira ekereja, mwa waatta waya, yaakhala ntoko otthuna. Vano kiirale exeenii? Kaahivahererya miyuupuwelo saka yoomi khwiitakaiha ni ekereja. Tthiri, nrowe niire. Vakhala...Ti siiso hiyo nnaaxeryaahu ehako, ti siiso yaary'aya okathi wa Bibilia, enamuna ekereja yaathanl'aya. O—otaphuwa, makhuru a atthu, yaamuthukumana. Mwa omosa sookhala ikuru. Vano, tivo, miyo khwira, “Vekeekhai, vakhala wira ti siiso ekereja entthunaaya, eyo yakhala ele Muluku onttthunaawe, Owo ookhalanaxa owerya w'othanla eriyari ya nikhuru nothene n'atthu ovikana Owo sirinaawe wa miyo, okhala wira nkirina yoowoona y'ohimya wira khivaatthuneya wiiriwa.” Tivo niniitakaiha ni ekereja, ni nineetta ni ekereja. Nto miyo kiri ottuli waya, wira kiireke sothene sinwery'aka, moone, wira kikhaliherye ekereja.

⁵⁷ Nlo naahaana okhala niwoko na khula muKristu ni khula mutthu mukereja, ti no wiiraana ni okhala vamosa. Etthu p'itthu ekereja enthanlaaya, ti yeeyo yaatthuneya hiyo weemererya. Vano niire, ntoko nlikanyiho, e...entthuna waakakhanyiwa etthu mukereja. Ahe, nto, vakhala wira maatinistaratoore antthuna o, e...mutthu mukina onttthuna o, matiyaakono, awo antthuna waakakhanya etthu, eyo enooruuheliwa ekereja, ekereja nto vamosa. Nto vakhala wira wawihu—muupuwelo ahu onkhala ntoko woovirikana vakhani n'ile ekereja yothene ehimmy'aya, nrowe nileve muupuwelo ahu, okhala wira eyo t'inamuna emosa paahi nikhanlyaahu okhalaka oowiiraana. Ni vakhala wira ekerej'ela enrowa enamuna nyuwo munrowaanyu vano, n'ukhala oowiiraana, Muluku ono...Ti yoohimalihey, etthu Owo onrow'awe wira, hiyo nakhalara vamosa. Nihaana okhala vamosa. Ti siiso nintthunaahu okhala, voomalela mmosa ni mukhwaawe, vano nto voomalela mmatatani mwa Muluku.

⁵⁸ Vano nihaana okhalana mutthu onaamini-ahu wira onlaleya Masu a Muluku. Mutth'uwo aahiireke, weso mumphwanye mutthu oniira. Ti siiso nirinaahu weemela. Vakhala wira nikhuru na maatinistratoore khinneemererya ele eri yooreera, vano muteko anyu omuthanla mutthu onrowa weemererya ele eri yooreera. Vano nto mwaira vale, mweemererye yeeyo. Owo mwah'anyu. Mweemererye yeeyo. Ni, othene vamosa, nineemererya Etthu emosa, owo Mulukuu.

⁵⁹ Mempuru mmosa avonya, muhimukhoote. Mmukhaliherye. Munvenxe. Muthukumane, mwiiwane mmosa ni mukhwaawe. Ti yeeyo Yoolempwa enihimyaaya. Hiyo navonya vale, nrowe

nirowe ohoolo wa Muluku. Nihinatthi orowa ohoolo wa Muluku, nihaana orowa ohoolo wa mutthu nimutthekenlyaahu.

⁶⁰ Okathi vakhani ovinre miyo kaahaana wira yeeyo. Ni koosuwela wira kaahivonya. Kaarimootha, kaahiwoothiha amwaar'aka. Kookupali wira kihooleelani iyo, vaava mukereja. Yaari mahiku vakhani, kahi khalayi, soovira isumana soophiyaka thanu na mosa. Alapeli yaarookikhaliha oohaaxeya, mwaha wa otokosa nno, mpakha vaakirikelaaya osuwela vaaryaaka-vo. Miyo kaammalaru orowa owaani okhuma oskritooriyu, wira kalye yolya y'ohiyu. Vano nummaru na telefooni na wiiphiini khuruma, nto Meda khurowa omwaakhula telefooni. Owo khimphurela ni ntata, khwira, "Ti alapeli yaale tho."

⁶¹ Miyo khwira, "Nkaawerya ovilela ohiyu mukina. Muru aka onkhala ntoko onoottipha. Onookipweteya muupuwelo aka, onkipurulela nno, ni iwe, ni nno." Miyo khwira, "Nkinwerya ovilela." Nto miyo khutupha, khwira, "Mwaalele wira nkikhanle mpaani mu," vano khutthyawela wiithela w'empa.

⁶² Vatthikalyaaka. . . Meda t'othananela saana itthu iyo. Owo khukiphwanya vamukhora, ahalaka wunla. Owo khwira, "Bill, ele ti yaari etthu yooreera wira?"

⁶³ Nyuwo moosuwela moota mury'anyu. Miyo koosuwela moota kiry'aka. Miyo khwira, "Khweeli. Miyo nkaari mpaani mu okathi ene yoole." Miyo kaahisuwela wira Muluku aahikipwapwela mwaha wa yeeyo. Miyo khwira, "Miyo nkaakhanle mpaani mu okathi yoole."

Khwira, "Masi nyuwo mwaari muumu okathi owo olikanryaawe."

⁶⁴ Oxe kuw'ole kaahirowa onvekelela mwaana aawereiwa. Nto kihinatthi okhuma owaani, telefooni aahiruma-tho, nto Joseph mwaamukhaani khutthimaka khimukuxa telefooni khwira, "Paapa, muntthuna kaalele wira khamukhanle vaava?" Munnoona moota etampi enihononaaya, etthoko xeeni yaarowaaya okhala vookiserya?

⁶⁵ Yohani Oopacerya, kapiitulu 5, versiikulu 21, ohimnye wira, "Vakhala wira mirima sahu khasinnilamula, nookhalana nrromelo ohoolo wa Muluku." Masi mirima sahu saanilamulaka, ninwerya sayi okhalana nrromelo ohoolo wa Muluku? Hiyo noosuwela wira, naakhalanakaru etampi ehilampwe, Owo khonkhalakhala aniiwaka. Eyo ti yoolipa, masi, eyo—eyo ti—eyo ti, ekereja ennithuna itthu iya.

⁶⁶ Nto miyo kipacerya onvekelela mwaan'ola. Nto vapaceny'aka omwiixaatherya matata, Apwiya ekipwapwela khwira, "Nyuwo moohimya etthu yoowootha. Nyuwo khamumphwanela onvekelela mwaan'owo."

67 Miyo khimurukunuwela mutth'owo. Miyo khwira, "Mwenye, mulipelele vaava. Kihaana etthu wira kilokiherye."

68 Miyo khimulikarela mulapeli ni khurowa oskiritooriyu, khumwiihana wira ovolowe. Miyo khwira, "Nwehe, mwenye, miyo kihootha. Koowoothiha amwaar'aka. Awo yaahimye wira nkaakhanle mpaani mme, nto kaatthimakenle wiithela w'empa." Nto miyo khulapa ni khimuleela yeeyo.

69 Khurwa khukipweherya matata vanikhatani vaka. Owo khwira, "Munna Branham, miyo kweekwe kinnoororomelakani, masi kootepaxa vano kihinatoko aka, mutthu," owo khwira, "ontthuna olokiherya soovonya sawe."

70 Miyo khimuleela, miyo khwira, "Kaahipacerya onvekelela mwaana, nto Apwiya yaamukipwapwela tu, mmurimani mwaka, okhala wira kaahisuwela wira kaahivonya."

71 Vano, mmeeloni mwaya, amwaar'aka khwira, "Munrowa woowi?"

Miyo khwira, "Mmuttuphani mwaka."

72 Vano miyo khurowa mmuttuphani mwaka, oCharlestown wu, weiwo onrowakaaka-wo, mwa miyaakha. Miyo khuvolowa mme, nto kaahivekela nihiku nle nothene, "O Muluku, muhikihiye-tho nakhala kitthikelaka wira etthu ntoko ele. Mukilevelele, Pwiya, maana vapacenryaaka owiixaatherya matata aretta, wira kaavekelele, vano kaahipwapweliwa." Ntoko iwoora tthaaru makaaripi, miyo kikhuma. Wookhala mwala muulupale ori vate vale. Vano miyo khuwela vamwala vaavale kaaweha epante onkhuma nsuwa, ni matat'aka osulu, kaattotopelaka Apwiya. Nto mwaari moomaaleleya mme. Nto miyo khwira, "Pwiya, Nyuwo paahi mwa... Okathi mmosa Nyuwo mwaahivira vakhiviru ni Moise, nto owo khwira wira aari e... okathi Nyuwo mwaarin'anyu yoowo mmutharini mwa mwala, nto yaakhala ntoko ettuli ya mutthu." Miyo khwira, "Nyuwo mwaamukhala oowiira-tho, Pwiya? Mukisuwelihe wira kooleveleliwa." Nto miyo khwira, "Nyuwo mwakihaliherya khurwa mmuupuweloni mwaka..." Miyo khwira, "Pwiya, miyo nkihiyo a ikuru vanci-ene, mwa muupuwelo, okhala wira nkisomme." Miyo khwira, "Nto miyo—miyo kimphavela woorumeelani Nyuwo. Nyuwo munnisuwela murim'aka, ni miyo nka... Nkaakhanle wira yeele. Nkaalakenle wira yeele. Muru aka waakhala ntoko waamukhuma, nkaareere wuukhuleya, ni kiirale mwa okathi vakhani Satana okivanryaawe." Miyo khwira, "Nyuwo mwakilevelela-ru, mukitthuniherye kiwooneni Nyuwo, nto, Pwiya."

73 Muluku okhanle Mphuki aka; vaavale vale mpararini mwaka, nipuro nimosa nikhaani mutakhwani khupacerya orukurerya etthu ntoko Ettheke, ni Eyo jaarwa epante-ene yeeyo ya muttupha kaaryaaka-vo, nto khurowa eviraka mutakhwani. Oh, munna, murettele onvikana muupuwelo

wothene khukivira, nto miyo khukhuwela. Khunla. Khunyakula. Miyo koosuwela wira itampi saka sooleveleliwa. Moone, miyo kaari oohiiraana ni Muluku, nkaawerya okhalana ovuluxiwa wa mwaana.

⁷⁴ Miyo . . . Nto mmeeloni mwaya aahikhala mulopwana mmosa a oChicago, yoowo okhanle mutthu muulupale, muKatolika aamanle orukunuxa murima, ivaavula vamurimani vawe saarimwiipa ntoko kammara a penewu oowiiseeliwa, nto awo yaahiphavela othikila mwa okathi munci-ene, yaarowa othikila, nto owo khaatthuniherya. Vookiserya owo khukhalana nvaanelo. Mivaanelo iye, hiyo ninkhalanaahu mpakha ophwanya ele evonyeie. Nto mulopwan'owo aaroovolowa paahi, mpakha Erooho Yoowaarya othokosa makhalelo awe othene khuhimya etthu owo aairaly'awe okathi waary'awe mmiravo a waltaari mukereja Katolika. Owo khwira, "Eyo ekeekhaii. Eyo ekeekhaii yoolikana." Khwira, "Muntthuna ohimya wira eyo yaari yookivirikanya miyo?"

Miyo khwira, "Eyo ti muuttutthi mmosa paahi onwery'aka wona mmakhaleloni mwanyu."

⁷⁵ Owo khutthika khimuhimeerya tothoro, khwira, "Vaareera, mutthokihe sothene vano, ninoorowa okhalana operasawu."

⁷⁶ Tothoro khwira, "Ninrowa omwaleya-tho murim'owo." Nto okathi omwaleiyaawe, owo khwira, "Khonthuneya operasawu." Munnona?

⁷⁷ Mirima sahu saanilamulaka, ninthuna ovuluxiwa woomalela. Khaninthuna okhala a nuusu, ekereja. Ninthuna nikhale ekereja y'ekeekhai ahiiso hata ekereja nnakhala. Hiyo ninthuna nikhale aKristu eekeekhai ahiiso hata aKristu nnakhala. Ninthuna ovuluxiwa woomalela mwa mihapo sahu, mwa itampi sahu, mwa wuupuwela wahu wootakhala, mwa wiira wahu wootakhala, mwa onyoonyiwa wahu, sothene siiralyaahu. Hiyo ninthuna ovuluxiwa woomalela, wira athu jaarwaaka mukereja mu, wira avekeleliwe, nikhale nikhuru nla naamukhaani (khino oohivikana emiya, wala imiya piili) akilanthi va, masi wira ekhale voomalela mmatatani mwa Muluku. Ni naavekelaka, nto Muluku onimwiiwa okhuma Wirimu. Muluku ommutthuna mutthu Owo okhanlyaawe onvarelaka mmatatani mwAwe, mutthu Owo okhanlyaawe wiiraka, "Miyo kinnimuroromela. Kinoowerya omuruma ola, murumeyi Aka onwereiwa, oBranham Tabernacle oJeffersonville, nto nikhuru nle n'atthu nri ni mwiiwanano mmosa." Etthu emosa enimwiiraneya.

⁷⁸ Ahe, nkawehani etthu Owo onniirelaawe hiyo ni mukhalelo nryaahu-mo. Exeeni Owo aarowaawe wira naakhanle ni murima mmosa ni mwiiwanano mmosa? Enamuna emosa paahi nikhanyaahu wiiraka yeeyo, wiiraaniha mirima sahu ni ophentana wa axinna, owiwelela akhulupale a mukereja, ni

pastore, ni pastore omwiiwelela Muluku. Vano Muluku onoovara muteko ovira mwa pastore, ovira mwa nikhuru n'akhulupale, mpakha mukereja, nto othene ankhala a omosa wa Omwene wa Muluku. Vano Muluku onimwiiwa, nakhalanaru nikhuru noowiiraana. Muhiihiye hat'etthu woohaaxani. Muhikhaleke oowoceya mwa hat'etthu.

⁷⁹ Vano, owo ti mutthu Muluku omutthokihenry'awe okuxa muttethe. Moise aari oomalela, owo aari mutthu ahiisakaleliha. Hata sikhalaka ikhotto ni onyakulihana, ni sikina, owo khaaisakaleliha. Ti yeeyo Muluku onnitthun'awe hiyo vano.

⁸⁰ Farawo aatthuna wiiwanana, khwira, "Moise, nyuwo othene pooti orowa, ni, masi, mwaahiye an'inyu ottuli, wala muhiye inyompe sanyu kamosa-kamosa wenno."

⁸¹ Ti siiso xetwani onttthun'awe wira muKristu arwe. "Enookhala saana nyuwo wiitakaniha ekereja, masi muhikhalakhale mmulevelelaka Jones. Enookhala saana mwawerya oruaha yawinyu...mwawerya vale orowa... Khamurina ohiya onvura sikaro anyu, owurya wanyu, wootha wanyu, wiiya wanyu, wuulumela wanyu, waapa wanyu. Khamurina yo ohiya eyo. Mwiitakanihe mukereja paahi."

⁸² Masi Moise khaari mulipa-ooakaleliha. Owo aatthuna ovuluxiwa woomalela. Owo iirale, "Hiyo khaninrowa ohiya hata niphita ottuli. Hiyo nnookuxa itthu sothene siri sawihu, okathi onrow'ahu waakokhorela Apwiya."

⁸³ Ti siiso ekereja erinaaya okhala. "Hiyo ninookuxa exariya. Ninookuxa oreera murima. Hiyo ninookuxa Erooho Yoowaarya. Hiyo ninookuxa nikhuru noowiiraana naarowaka waltaari. Hiyo ninookhala nikhuru n'ekeekhai. Hiyo khaninhiya hat'etthu ottuli. Hiyo ninookuxa sothene. Khaninrowa okhala hata niphita ninhala wenno." Nyuwo moosuwela, nto atthu anoowerya ovekela mwa enamuna emosa mpakha xetwani orinaawe ohiya.

⁸⁴ Ti siiso Moise nnikhuru nawe yiiranse-aya. Awo yaarophiyasa iwe khukhala vathi v'Ephome. Mwaweha vale, mpakha awo okela vathi v'Ephome, khuwaakhanle ovuluxiwa woomalela. Moise, mwaneene, owo aari owiiraana ni Muluku, masi Isarayeli khaari. Nlelo yaahikhala etampi. Ni awo yaanaapa envirikanyaka Moise, nto awo yiiraka, "Xeeni, xeeni nyuwo wiiraka yeela? Nyuwo munniruuhelelatho mukacamiho." Okhala wira, Farawo aammalaru waattitha vanli muteko aya wa itixolu, ni sikina. Owo aari Moise; owo aari mmatatani mwa Muluku voomalela, oovuluxiwa voomalela okhuma osukiha ipwittipwitthi, wira asukiheke ipwittipwitthi sa Muluku. Owo aari oovuluxiwa voomalela, yoowo. Masi atthu khiyaari oovuluxiwa, okhala wira awo nlelo yaamwaapa eriyari aya.

⁸⁵ Ohiyu umosa Muluku aarumyaawe wira mwaapwittipwitthi aahaana wiiviwa, nthoonyeryo na Kristu,

ni wira ephome epwinihiwe mwiisooni, yaawo, akhanle malaxi paahi (pure, oowiyeviha), ni ohela vasulu va mukhora ni mmariipuni, owo p'ukathi Isarayeli aakhanlyaawe oovuluxiwa voomalela, woohihiya hata niphita ottuli. Sothene saari sawaya saahivuluxiwa. Amusi aya, oophentiwa aya, ni itthu sothene saari soovuluxiwa okathi jaarwiyaaya voomalela vathi v'ephome.

⁸⁶ Owo p'ukathi ekereja enrowaaya ovuluxiwa voomalela, okathi itthu sothene sinrowaaya orwa vathi va Ephome. Okathi itampi sanyu sinrwaaya vathi va Ephome, okathi onvura wanyu sikaro, okathi omweetta wanyu cuuku, okathi woottha wanyu, okathi wiya wanyu, okathi wootha wanyu, okathi itthu sothene sinruuhiwaaya vathi va Ephome, vano onookhala ovuluxiwa voomalela. Nyuwo mwamutthekela mutthu, mulokihe. Khamukhanle oruhaka eyo vathi va Ephome, khenrowa okhala. Khamukhanle oruhaka. Etthu emosa khenrowa wootthuniheryani. Okathi mukhalelo anyu onkhalaaya wooruhiwa, voomalela ni voolikana-ene vathi va Ephome, onookhala ovuluxiwa voomalela; vano munookhalana otaphuwa ntoko sihinasuweleke-anyu khalayi. Okathi itthu sothene sinruuhiwaaya vathi va Ephome, oruhiwa mowiivahererya Momweneni mwa Muluku, nto onookhala ovuluxiwa w'ekeekhai.

⁸⁷ Yesu aari mutthu, voomalela voolikana. Owo aamuwerya wunla ntoko mutthu. Owo aaniwerya olya ntoko mutthu. Owo aamuwerya okhulumuwa ntoko mutthu. Owo aari mutthu, voolikana voomalela, mwa mukhalelo Awe w'erutthu. Nto mwa Erooho Awe, Owo aari Muluku, voomalela voolikana, tivo aahikhaliha erutthu Awe wiivahererya Erooho yaari mwa Yoowo. Moone, Owo aahittehattehiwa mwa inamuna sothene ntoko hiyo. Owo aari mutthu, kahi Nlaikha. Owo aari mutthu. Owo aahikhalana sootthuna ni ottehattehiwa, siiso ntoko hiyo. Bibilia ohimye wira Owo aahikhalana. Owo aari mutthu, kahi Nlaikha noohikhalana ottehattehiwa. aHeperi 1 ahimye wira, "Owo aari . . ." aHeperi 1:4 ahimye wira, "Owo aahikhalihiwa mukhaani ovikana Malaikha." Owo aari mutthu, mutthu voomalela; wira Muluku aamukunxe mutthu oomalela, wira oruhe ovuluxiwa voomalela, ni Owo aahimusariha Erooho Awe. Erooho Yoowaarya yaari mwa Yoowo, yooikhhalana mphimo. Ni Owo aahittehattehiwa ntoko hiyo. Ni Owo aari Muluku voomalela. Owo aahooniherya eyo okathi Owo ohihimunwaawe mw'alipa-ookhwa, okathi Owo eemenxaawe ephattu, ipahari soowali ni ittheke sa ikuru. Okathi Owo olavunly'awe ni miri, ni sikina, iyo saahimwiwelela Yoowo. Owo aari Muluku, muhina. Ni Owo aamwiira okhanle-ene mutthu, maana Owo aari mutthu, masi Owo voolikana ni voomalela aahiivahererya Mmansawe (ntoko mutthu) mmatatani mwa Muluku, wa muteko wa Muluku.

⁸⁸ Ni Owo ti ethoonyeryo ahu. Hiyo n’alopwana ni athiyana. Hiyo nave-tho n’aKristu. Owo aakhanle-ene ethoonyeryo ahu, nrowe voomalela niivahererye mmatatani mwa Erooho Yoowaarya, wira hiyo niwerye okhala anammuttettheni a Omwene wa Muluku.

⁸⁹ Owo aari mutthu voomalela; Owo aari Muluku voomalela. Masi Owo aahivahererya ipantte Sawe sa erutthu wa Yawawe. . . ni ipantte Sawe sa erutthu, ni muupuwelo Awe, ni wiira Wawe, ni ovelavela Wawe, ni, “Miyo kiniira paahi ele enaasivela Atithi.” Eyo eri vo. Oovuluxiwa voomalela mwa atthu. Anamukuttho yaahirwa wa Yoowo, atthu aalupale, nto khwira, “Rabbi, *lexe ni lexe*,” ni khweererya omuttettekha Owo wira akele mopatthanani mwaya ni miromolelo. Masi Owo aari oovuluxiwa voomalela okhala wira Owo aamuroromenle Muluku.

⁹⁰ Mulipa a Masalmo khohimnye wira, “Nyuwo munoonvuluxa Owo, okhala wira Owo ookiroromela Miyo voomalela”? Munnona? “Miyo kinoonvuluxa Oophentiwa Aka mwa alapwa, okhala wira Owo ookiroromela Miyo.”

⁹¹ Ewoora enrowaahu ophiya woomalelani wa ekwaha ya ekumi, kintthunela yawaka. Koosuwela wira nyuwo munnitthunela yawinyu. Kintthuna wira Owo ahimye, “Miyo kinoonvuluxa owo mwaano mwa okhwa, maana owo ookiroromela Miyo. Miyo kinoonvuluxa okhuma mmahiye, voosiisu wa ohihimuwa, onvuluxa voomalela, sothene munepa, erutthu, ni Erooho, okhala wira owo ookiroromela Miyo.”

⁹² Miteko sothene sa Yesu saari soomalela. Itthu sothene saari soovuluxiwa, voolikana, voomalela. Owo aahinvuluxa makuttula namakuttula voomalela. Owo aahinvuluxa muthiyana aavuuva ephome voomalela, ovuuva wawe. Owo oovuluxa olumwenku mwa etampi voomalela, okathi Owo okhwiyaaawe nihiku na ettipiheryo. Owo oovuluxa khula etampi voomalela. Owo oovuluxa Ekereja. Tivo khivantthuneya hiyo okhala vathi va oreeriwa wahu, mw’atthu. Khivantthuneya hiyo okhala mwa mukhalelo wooxinttiwa, okhala wira Owo oomuxintta xetwani khukuxa omwene wothene ni owerya, khukhalihla vathi va inawu Sawe, nto iyo khasirina hata ihaaki mwa ikano wira soorumekeni. Hiyo n’aKristu, oosareya Erooho Yoowaarya. Hiyo khanrina oru-. . . omuhiya xetwani oniruma hiyo. Kristu oonivuluxa, ovuluxa woomalela; oonivuluxa mwa sootakhala, oonikvuluxa mwa etampi, oonivuluxa mihapo, oonivuluxa mwa olavulasa, oonivuluxa mwa—mwa okhala atthu a vathi, oonivuluxa mwa inamuna sothene sa itthu soonanara. Owo oonivuluxa voomalela khunihela mmatatani mwAwe oowaarya; ovuluxiwa woolikana, woomalela.

⁹³ Owo oovuluxa iretta sahu. Owo oonivuluxa iretta, maana nihaana epaphelo ya omwaneene wa yeeyo. Aleluya! “Okhala wira Owo onyakatteliwe sootheka sahu, makhwatta Awe

t'anivoninhe.” Owo ti Mpenuxa ahu. Mwaha wa yeeyo oowooniha othunku, muthiyan'ole, oosupiwa, ailipihaka wira aakhapelele ay'awe yaaluwela ni kankuru, aakenlyaawe muhina Ohoolo wa Muluku. Owo aahaamini. Nto owo... Mameetiku yaahiira sothene saawery'aya, tivo owo khutthara miixuttiho sa Muluku vano khuvuluxiwa voomalela.

⁹⁴ Awiixutti yaahikhalana ovuluxiwa woomalela, ovuluxiwa woomalela vekeekhai. Mwaha wa xeeni? Okhala wira awo yaari oosareya Erooho Yoowaarya voomalela ni voolikana. Nyuwo, mwakhalaru mempuru a ekereja paahi ni ovahana matata ni pastore, wala akina... kaahikhalana enamuna emosa ya musuwelelo mwaamukhaani w'otupha, okhuwela, wala olavula ilavulelo, wala etthu ekina; ni nlelo munakhalana etakhalelo mmurimani mwanu, soowiira sootikiniha, moothaka, mwaavuraka asikaro, mwaakhalelaka ethaama athiyana; yookhala etthu ehiiraneieye nlelo. Yookhala etthu ehilonke. “Okhala wira ole omphenta olumwenku, wala itthu sa molumwenkuni, ophenta wa Muluku khokhanle mwa yoowo.” Muhootothiwa. “Ni mihokorokho saya munimwaasuwela.”

⁹⁵ Hiyo othene nintthuna nikhale oowiiraana vamosa, ni Erooho Yoowaarya. Khula mempuru aahaana okhala oowiiraana, mmosa ni mukhwaawe. Ophenta wa Muluku onoomwareela mmurimani mwahu, ni Erooho Yoowaarya. Eyo ennirapiha mwa sootakhala sothene. Hiyo noovuluxiwa mwa itthu sa molumwenkuni. Yesu ohimnye wira, “Ela atthu othene anoosuwela wira nyuwo mw'awixutti Aka, mwakhalanaru ophentana, mmosa ni mukhw'awe.” Mempuru mmosa aamphentaka saana mempuru mukina mpakha vaarowaawe omukhwela.

⁹⁶ Etthu emosa yootakhala yapaceryaru, olumwenku ota, athiyana kamosa-kamosa khunarwa ni wira, “Vano, nkawehani, oophentiwa. Yaamukhala yooreerela nyuwo mwaairale *ela*, wala wira *ele*, owara *ela*, wala wira *ele*, wala mwiirale *ela*, n'ukhuma nikhuru nle na masantu oophirikeya,” wala ekina siiso, hiyo nri oowiiraanaxa ni Muluku!

⁹⁷ Nyuwo muniira, “Ahe, Munna Branham, iwo weereriwa woowooapiha.” Masi Kristu okhwenle niwoko nenlo. Xetwani ooxinttiwa. Hiyo nintthuna ovuluxiwa woomalela. Hiyo nintthuna ekereja ekhanle yooloka yooreerela ni yoohihononiwa, ni yoorapihiwa Mphomeni mwa Mwaapwittipwitthi, ni yoosareya Erooho Yoowaarya, ni ithoonyeryo ni mitikiniho ni miiriirya. [Nipuro vahiitthu mufiitani—Mol.] ...othene oovuluxiwa voomalela. [Nipuro vahiitthu mufiitani].

⁹⁸ Muluku Oophentiwa, Nyuwo khamunkuxa itthu vahikhanle wira soovuluxiwa voomalela. Khimwaakhanle waakhelaka mukuttho orina nlepa mwa yoowo. Nyuwo khamwaarowa nakhala waakhela mavekelo, ekhanle-ene etampi ottuli

mmakhaleloni mwa mutth'uwo. Khimwaakhanle oowiiraka paahi, Pwiya. Nyuwo khimwaairale siiso okathi ovinre, ni khimukhanle wira olelo. Masi mukuttho ohaana okhala woohikhalana nlepa. Pwiya Muluku, nikokhoraka waltaari, ekumi yoovahereriwa, mukumihe mwa hiyo, Pwiya, malepa othene a etampi. Miyo kinnivahererya voomalela munep'aka, ni erutthu aka, ikuru saka, ni wiilipiha waka, ni ekereja ela voosiis'ula, waltaari. Munikukutthe ni Ephome Anyu, ni munilevelele khula etampi hiyo niiralyaahu. Ni wira Erooho Yoowaarya yuulupale ekhale mwa hiyo voowaattaxa, ni Mukhalelo Awe orowe ni hiyo okhuma mutapernakulu mu voosiis'ula, wira hiyo nisuwele muhina mwahu mmansihu wira Owo oonilevelela. Vano mavekelo anookhala, "Munlevelele soottheke sahu ntoko hiyo ninaalevelel'ahu ale annitthekele." Munivahe, Pwiya.

⁹⁹ Nyuwo mukhale vakhiviru ni hiyo vano, munireerihe ni munisuke mpakha nikumane-tho vamutekoni w'okokhorela w'ohiyu. Nivelowe ni matata ooreera ni murima wooloka, wira Nyuwo muhikhootte, maana hiyo nintthuna ovuluxiwa woolikana ni woomalela mwa khula etthu, Pwiya, yaarowa onikhoottiha okhala muthuko wa molumwenkuni; muthuko othomeiwe vasulu va mwaako kahi mukulukutheleni, masi muthuko onthomeiwa vasulu va mwaako, ommwaleela wira weettiheryeke inawu s'atthu mphironi eri yooloka. Munivahe, Tithi. Hiyo ninvekela mwa Nsina na Yesu, ni wa Ovuwu Wawe. Amen.

¹⁰⁰ Kinrowa onvekela Doc. . . Kinoona wira ori ottuli iwe, wala mmosa wa matiyaakono ori vaava. Wira ekereja esome ela, Doc, murwe muhele ela vakwaaturu va mihupi wira ekereja ewerye woona awo yaakhumaka. Vano nto Munna Collins, owo aaryeene vaava. . . Munna Collins ori muumu? Munvahe ela ekina.

¹⁰¹ Nto, vaareera, mulopwana, nto nmimoona etthu. . . [Munna Branham onsoma yoolepa—Mol.] Ookhala mutthu onthuna nvaanelo. Kweekwe onnivaheriwa. Ninnitteeliwa murima.

Ni kookhalana mivaanelo. Moone, etthu murinaanyu wira olikarela nummaru nahu vate vale. Hiyo—hiyo naanikhalana mukattyamiho munci-ene owaani, ekereja ennisuwela. Ala aletto. Ekereja ennisuwela eyo. Yaahaana oheliwa ekapatti yaamukhaani. . . Miyo kinoohela vaava mukereja, nave, wa ale anoorwa. Moone, aakhala anci-ene, ahinwery'ahu waacalela othene aya, ale anoorwa ni nummaru paahi. Munnona? Nto hiyo. . . Nyuwo mwalikariru paahi BUtler 2-1-5-1-9, BUtler. [Nummaru na telefooni noopatiliwa—Mol.] Ni khula mmosa wa mamempuru onimoona mutthu ti mutthu onthuna, miyo okathi wothene kinnitteeliwa murima owoona atthu. Masi hiyo nookhalana eyeettiheryo yoohihyererya. Aakhala kamosa-kamosa alikanri, anci-ene, moone. Nto hiyo noophiya, mmosa-mmosa, naarwaaka. Nto yookhala. . . Yaanikhalaka wira,

naakhalanaka enamuna ya piswapiswa, khula enamuna, otupha, otuphatupha, athu yaarowa owaani siyo ni sothene. Vano awo aakhalana sothene oratteene. Nto ti yeeyo hiyo emphavel'ahu olavula vano, moone, ohela sothene oratteene, voolikana.

Ni kinooteeliwa murima woona nikhuru nla noophentiwa, awo yalikarelaru paahi BUTler 2-15-19 (1-5-1-9), nto Mwenye Mercier wala Mwenye Goad, mmosa, onoomwaakhula telefooni ni wooleelani oratteene okathi onrow'anyu okhalana ovarihana. Hiyo nookhalana nipuro iwe, ni etheku yooreerihiwa, ni noolikana wira niwaakhele athu ni waavekelela. Hiyo ninnithapa paahi wira yeeyo.

¹⁰² Vano, etthu ehinweelaaka okereja, athu anuupuwela wira kinthuna wihuluxa athu; kahi yeeyo. Kimphavela o—okhala oratteene saana. Munnona? Ti yeeyo entthunaaka okhala, ohaathanla athu. Khula mutthu, mutthu ti mutthu, khula nipuro, khula okathi, moone; nikhuli, eyaaminelo kherina nnaata n'iyu. Ninoorowa iwe n'uthukumana n'atthu. Nto yakhalana yootthuna, hiyo ninookhala vale ni Muluku mpakha omaliheriwa. Awo yaatthunaka osuwela etthu p'itthu sa mithukumano, vekeekhai, hiyo ninookhapelela eyo ni osuka. Iwo weetiherya paahi wa Erooho Yoowaarya. Ni eyo. . . Enamuna eyo, kinooona wira ti y'exariya, othene aneettiheriwa voolikana saana. Tivo, khuuvo othanliwa wa mutthu, hata othanliwa.

¹⁰³ Yaahikhala athu jaarwenle ovekeleliwa, voosiis'ula, yaawereiwa ni enatthuna ovekeleliwa? Vaareera. Khakhanle.

Vano nrowe niipe nsipo nooreera wa o. . . wa okokhorela. Niipeke exeeni voosiis'ula? "Exeeni enwerya okumiha itampi saka?" Munnisuwela, Teddy? "Hat'etthu woohikhala Ephome ya Yesu." Exeeni enwerya. . .

[Munna mmosa muthiyana onlavula ni Munna Branham—Mol.] Vaareera, mulopwana. Munthuna owo avekeleliwe naanaano va?

Kinrowa onvekelela muthiyan'ole. Omwiixatherya matata muthiyan'ola va. Mwaamutthuna wuurama muru anyu ni miyo, nto, voomaaleleya vano.

¹⁰⁴ Muluku Ootthuneya, ookhala muhano ohinreere owereiwa. Munn'ihu onthoonerya erutthu awe, wira amukumihe kankuru mw'akina, wira eemele v'ephakani, mwaha w'akina. Masi Nyuwo munninvuluxa mwa yeeyo, Pwiya, mahiku vakhani avinre, okathi itthu iyo saasuweliwaaya. Mmutthuniherye paahi wira owo asuwele, mwaneene, nto, Pwiya, onosuwela wira enkhuma wa Nyuwo. Miyo kinnimwiixaatherya matata, ni kinvekela omoreliwa ikharari muthiyan'owo mukina owo onimuthooneryaawe. Mahala a Muluku, Owerya wa Erooho Yoowaarya. . . Yaakhanle-ene etthu yootakhala mmurimani mwahu, Pwiya, munuupululele toko, nto ninoorowa, okhaliha oratteene. Vano noosuwela wira nookhalana ocaliwa ni Muluku,

nookhalana murettele ni Muluku, hiyo nmimwaakhela ele envekel'ahu, okhala wira khanrina olamuliwa. Munivahe, Pwiya. Mwa Nsina na Yesu miyo kinnivekela. Amen.

Vaareera.

Exeeni enwerya orapiha itampi saka?
 Hat'etthu woohikhala Ephome ya Yesu;
 Exeeni enwerya okikhaliha mukumi tho?
 Hat'etthu woohikhala Ephome ya Yesu.

Oh, wooreeraxa ti muro
 Onikikhaliha ootteela ntoko etthapwe;
 Khekhanle ephattuwelo ekina ensuwel'aka,
 Hat'etthu woohikhala Ephome ya Yesu.

¹⁰⁵ Akavi anoona wira itampi sanyu sothene siri vathi va Ephome? Nrowe niipe ni matata osulu vano.

Exeeni enwerya orapiha itampi saka?
 Hat'etthu woohikhala Ephome ya Yesu;
 Exeeni enwerya okikhaliha mukumi tho?
 Hat'etthu woohikhala Ephome ya Yesu.

Vano nikuruxaka matata ahu, nrowe nivahane matata.

Yooreera ti . . .

Ti yeeyo, mapuro othene.

. . .sootteela ntoko etthapwe;
 Khekhanle ephattuwelo ekina ensuwel'aka,
 Hat'etthu woohikhala Ephome ya Yesu.

Munnimphenta Yoowo? Amen.

Oh, moota onimphent'aka Yesu,
 Oh, moota onimphent'aka Yesu,

Vano mukhale ni yeeyo, vano. Aththu othene envarelele Muluku.

Moota onimphent'aka Yesu,
 Okhala wira Owo t'opacenrye okiphenta.
 Miyo nkinimuhiya . . .



OVULUXIWA WOOMALELA EMK59-0712
(A Total Deliverance)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku voosiisu, mahiku yeettaka 12 mweeri wa Julho, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org